

四庫全書

子部

欽定四庫全書

六藝之一錄卷三百八十二

錢唐倪濤撰

歷朝書譜七十二

宋賢墨蹟

詩翰

薛道祖雲頂山詩卷

山壓衆峯首寺占紫雲頂西遊金泉來登山緩歸軫昨
暮下三學出谷已延頸山名高劍外回首陋前嶺躋攀
困難到賴此畫亦永巍巍石城出步步松徑引青霄屋

萬楹下俯二川境玉壘連金雁西軒列阡畛青城與岷
峨天際暮雲隱少城白烟裏水墨澹微影江流一練帶
不復辨漁艇東漸梓澤隘右喜錦川迴槃陀石不轉枯
枿弄芒穎四更月未出蕙帳天風緊客行弊帑垢到此
凡慮屏暫時方外遊聊怯素心靜明朝武江路拘窘逐
炎景建中靖國元年七月廿四日翠微居士題
上清連年寶享清適絕塵物外皆自製亭名也錄示詩
句未見佳處想難逃老鑒也舊藁不存尚可記憶

雨不濕行徑雲猶依故山看雲醒醉眼乘月棹迴瀾水
上三更月烟中一葉舟寒臨重閣迴影帶亂山流暮烟
秦樹暗落日渭川明平林映日疎野草經寒短霜乾葉
飄零日出水清淺官冷繫懷非吏事地偏相訪定閒人
一馬春風過微雨竹間歸路淨無塵鷗鷺驚飛起秋風
菱荇花一徑入中渚坐來惟鳥啼水雲生四面常恐世
人迷綠逕無行路蒼苔露未晞曾夢春堂題碧草偶來
霧夕看紅蕖無人雲閉戶深夜月為鐙曉雲凝蕪逕斜

陽滿畫橋不眠聽竹雨高卧枕風湍橋橫雲壑連朝渡
雨暗鐙窓半夜棋微風拂涼吹澹烟生遠樹天寒湘水
秋雨暗蒼梧暮乘月多忘歸往返帶霜露自然鷗鳥親
日與漁樵過去意已輕千里陌深杯難醉九迴腸灞陵
葉落秋風裏忽對霜天數雁行已上雖記然全章皆忘
之矣語固未佳要之恐平生經心一事老友必憐其散
落便風早以為寄也紹彭再拜更有第三篇今亦不見
來信不言及必不在彼不知失去何處如何如何

左綿山中多青松風俗賤之止供樵爨之用郡丞僧刹
不見一本余過而太息輒諷通守晉伯移植佳處使人
知為可貴東川距綿百里餘入境遂不復有晉伯因以
為惠沿流而來至此皆活作詩述謝併代簡師道史君
紹彭上

越王樓下種成行濯濯分來一葦航偃蓋可須千歲幹
封條已傲九秋霜含風便有笙竽韻帶雨偏垂玉露光
免作爨烟茅屋底華軒自在拂雲長

通泉字法出官奴日日臨池恨不如雙鯉可無輕素練
數行惟作硬黃書鄉關何處三秦路馬足經年萬里餘
多謝玉華宮畔客新詩未覺故人疎 和巨濟韻 臨
池通泉為如字韻牽非實事也不笑不笑

韓子華承師詩帖

行楷書

絳偶成拙頌寄冲師長老潁川韓絳上

承師一指便心空萬象森羅觸處通別後自它知不隔
漫漫積雪起寒風

蘇子美留別王原叔古詩帖

交道今莫言難以古義責錙銖較利害便有太行隅子
生惟闊疎逢人出胸臆一旦觸駭機所向盡戈戟平生
交遊者化為虎狼額謗氣慘烈烈中之若病疫遂令老
成人坐是亦見斥既坐芸香署又下金華席摧辱實難
任宦名非所惜罪始職于予時情未當隙今來濠州涯
日夜自羞惕高風激頽波相遇過平昔白玉露肺肝晴
雲見顏色乃知天壤間自有道義伯明日又告行嗟嗟

四海窄 舜欽作詩留別 原叔八丈閣下 慶厯乙酉清明日書

文徵明跋見前

秦少游竹詩蹟

草書

墨君颯颯風雨鳴垂鸞舞鳳翻青綬一竿珍重幾百緡
奚啻渭川三百畝金鏘玉戛宮珮聲婢行奴顏謝花柳
得意真從寂寞間卓古高標壓羣醜不須辦直致湘江
便覺滿意寒意透挺然葉節抱風孤頻應君子虛心受

雷迸箨龍龍欲走櫻筍紛紛徒適口破除肉味若聞韶
王猷笑咏還依舊藉檻湘陰淨簡書接地春華幻塵垢
拂手筆端可有神往來平安慰良友前時無偶後無繼
奇賞祕靈宜永久元豐三年上元日淮海居士秦觀識

陳晉之詩帖

行書

太常少卿陳暘

行藝當年帝所聞聲名久矣動簪紳文場秉筆淵源厚
師席談經業履醇白髮忽驚蒿里暮青衫難問若溪春

兩京模範垂芳遠多少生徒淚滿巾

岳武穆題池州翠光亭詩

愛此倚闌干誰同寓目閒輕陰弄晴日秀色隱空山
鳥樹蕭騷外征帆杳靄間予雖江上老心羨白雲關岳飛

蘇後湖詩翰

德友近在咫尺乃不相過因成小詩呈庠上
十日已吹梅信風絕憐未許一樽同喜君不減習主簿
愧我殊非龐德公

德友求簷蔔花栽戲作小詩代簡庠上

問訊雲蘿小隱家
剡藤醉墨半欹斜
酒餘落筆已殊絕
發興不須簷蔔花
前席中席闕逸得非有酒餘落筆
之興乎呵呵

徐謂李壽臣蘇嶠陳雉諸跋見前

陳簡齋詩蹟

耿耿虛堂一榻秋
人間高枕幾王侯
亂雲未放曉山出
片月不隨溪水流
檢較一身渾是嬾
平章千古得無愁

湘波見說清人骨恨不移家阿那州 山居

水堂長日靜鷗沙便覺京塵隔鬢華夢裡不知涼是雨
捲簾微濕在荷花 雨過

妾在長千里春慵晏未起花香襲夢回畧畧事梳洗妝
臺罷闕鏡盛色照江水郎帆十幅輕渾不聞櫓聲曲岸
轉掀蓬一見今日成羞聞媒致辭心許郎深情一牀兩
年少相看悔不早酒懽娛藏闥園嬉索鬪草含笑盟春
風同心以偕老郎行有程期郎知妾未知鷁首生羽翼

蛾眉無光輝寄來紙上字不盡心中事問遍相逢人不
如自見真心苦淚更苦滴爛閨中土寄語里中兒莫作
商人婦 長干行

風雨吳江冷雲天故國賒扶頭呼白酒揩眼認黃花客
夢蟲聲歇邊心雁字斜明年又何處高樹莫啼鴉 九
日家中去非

張震跋見前

蔣宣卿詩帖

行楷書

兔井橋邊鷄首橫過逢仍怯近鄉情路人失喜交頭語
鄰犬何知掉尾迎重到雲房驚落莫直須金闕早崇成
百年香火追先志始信吾宗世濟榮

慣見琳宮全盛時竭來荒梗倍傷悽虛堂不復瞻遺蹟

先考通奉書壁在八將院今不復存敗壁纔容覓舊題

伯考樞密太師題三史院僅留數字

帝傅前修皆矩矱雲孫後裔合攀躋興衰補弊宜商略
徙倚西廊日欲西

冲寂觀去南莊數里肇建于有唐逮今數百年中間衰

弊吾家曾祖太傅公為司出納且主盟興起之相繼累
世不墜兵火之後殿宇久廢弗理房室荒寂璨今再至
不勝感歎故作二詩紹興甲乙季秋乙亥蔣璨拜呈

吳傳朋三詩帖

游絲書

樓前暮靄暗平林樓上人愁寒思深未必薄雲能作雨
從來秋日自多陰三年客夢迷歸路一夜西風老壯心
欲作新聲寄遺恨直教先斷緩盈琴

久陰忽晴已可喜況復夜氣驅蚊藏清風逆迴六月熱

急雨借得三秋涼非惟歸雲人目快更有白月天心當
從來萬古有未盡待子一夕心胸張

劍氣寒高倚莫空男兒日日鏖心胸莫藏牙爪同癡虎
好名風雷起卧龍世說王侯無宿種古常富貴及耕農
須將大道為奇遇莫踏人間齷齪踪 紹興戊辰歲十
月十三日書於雙港吳說傳朋

張敬夫寄劉公詩帖

棧項在湘中嘗約劉公脩斜川故事城南有邱歸然因

以南阜名之是歲來守桂林負此約三年矣戊戌
五月與周允叔吳德夫宇文正父傳父登雪觀和五柳
翁韻謹書以寄劉公栻再拜

行客念故里勞者思少休如何歲華新當爾天南游涉
五遇佳日品題自名流聊復揩病眼沙邊玩輕鷗和風
著冠巾春意動林邱眄懷千載人孤高諒能儔亦有一
二士舉酒相勸酬未知吾故國草木如此否政拙甘下
考志短忘百憂賜歸倘蒙幸舊盟良可求

劉刑部和敬夫詩帖

敬夫寄斜川時叙往年之約殊不知爲今病矣非如昔時獨心不忘耳勉和一章以叙謝意爲再拜

病著不任事淹卧心自休經時不出門况復斜川遊每覲節物換恍驚時序流少年喜追逐聚散水上鷗沈舟枯木伴風帆春樹邱我病正爾許懷念老朋儔有酒不能飲徒有獻與酬故人酌佳日亦復念我否佳章寫懷抱一讀寬百憂吾君念遠民歸計未易求戊戌三月乙

丑順寧閣

朱文公畫寒詩卷

朱考亭畫寒書卷

篆書
引首

崑山王綸理之

僊洲幾千仞下有雲一谷道人何年來借地結茅屋想
應厭塵網寄此媚幽獨架梁俯清湍開徑玩飛瀑交遊
得名勝還往有篇牘杖履或鼎來共此巖下宿夜燈照
奇語曉策散遊目茗椀共甘寒蘭皋薦清馥至今壁間
字來者必三讀再拜仰高山懔然心神肅我生雖已後

久此寄齋粥孤興屢呻吟羣遊幾追逐十年落塵土尚
幸不遠復新涼有佳期幾日戒征軸宵興出門去急雨
過原陸入谷尚輕埃解裝上銀燭虛空一瞻望遠思翻
蹙慙袒跣亟躋攀冠巾如膏沐雲泉增舊觀怒響震寒
木深尋得新賞一簣今再覆同來況才彥行酒屢更僕
從容出妙句珠貝爛盈朶往生更疊疊俊語非碌碌吾
纓不復洗已失塵萬斛所恨老無奇千毫真浪禿 右
遊書寒以茂林脩竹清流激湍分韻賦詩得竹字乾道

七年歲次辛卯三月朔後二日新安考亭朱熹書於畫
寒方丈

吳錢王世貞二跋見前

朱文公城南詩卷

奉同張敬夫城南二十詠

詩筒連畫卷坐看復行吟想像南湖水秋來幾許深

納湖

小山幽桂叢歲暮藹佳色花落洞庭波秋風渺何極

東渚

綠漲平湖水朱欄跨小橋舞雩千載事歷歷在今朝

詠歸

橋

考槃雖在陸澠淒水雲深正爾滄洲趣難忘魏闕心

船齋

堂後林陰密堂前湖水深感君懷我意千里夢相尋

麗澤

堂

光風浮碧澗蘭杜日猗猗竟歲無人采含薰祇自知

蘭澗

君家一編書不自圯上得石室寄林端時來玩幽蹟

書樓

藏書樓上頭讀書樓下屋懷哉千載心俯仰數椽足

山齋

先生湖海姿蒙養今自閎銘坐仰先賢點畫存彖繫

蒙軒

疏此竹下渠漱彼澗中石暮館繞寒聲秋空動澄碧
瀨石

西山雲氣深徙倚一舒嘯浩蕩忽騫開為君展遐眺
卷雲

亭

渚華初出水隄樹亦成行吟罷天津句薰風拂面涼
柳隄

月色三秋白湖光四面平與君凌倒景上下極空明
月榭

涉江采芙蓉十反心無數不遇無極翁深衷竟誰識
濯清

朝吟東渚風夕弄西嶼月人境諒非遙湖山自幽絕
西嶼

湖光湛不流嵌竇亦潛注倚杖忽淙琤竹深無覓處
淙琤

谷

綵舟停畫槳容與得歌眠夢破蓬窓雨寒聲動一川

雨聽

舫

仙人冰雪姿貞秀絕倫擬驛使詎知聞尋香問煙水

梅隄

湖平秋水碧桂棹木蘭舟一曲菱歌曉驚飛欲下鷗

菱采

舟

高邱復層觀何日去登臨一目長空盡寒江列暮岑

阜南

于文傳跋見前

陸放翁自得我心詩蹟

行書

能自得我心無入不自得靈府長優閒
蕉鹿烏能惑濁醪吞數升浩氣漫漫塞
醉來隱几酣屢到華胥國人生貴適情
何當調語默放翁游作

洪聖俞道場詩卷

何山如幽人道場如大家穰穰衲子脚
刺刺騷翁牙挾雋控寒飈披光躡晨霞
危顛矯窳堵平疇略汙邪巖泉跑虎湧
徑松髯龍拏鐘梵破深寂金碧開芬葩
修廊步

履峻傑閣望眼賒山勢珮玦矗湖光鏡奩卻清節杳靄
入古弁空濛遮列翠不可唾羣籟無敢譁坐我旃檀林
酌之鎗旗茶宇定岫出雲語妙天雨花吾生久墮甌昔
遊慣乘槎夷猶廬阜陽宿留岷江涯高曾留嶠棧卑或
搜崖窪舊夢難厯省此行足雄誇老親八十健閒儔二
三佳拍浮一葉渺收覽萬景奢富貴上蔡犬貧賤東陵
瓜未須笑落鐸誰能苦觴沙侯門占噪鵲旋橈趁歸鴉
奇事恐汲汲舉詩屬僧伽端平甲午秋九月庚申追記

壬辰小雪前奉親游道場詩書以遺住山舟老古潛洪
咨夔舜俞

法舟趙孟頫黃潛錢惟善馬治法膺諸跋見前

趙子固題道場詩

重到招提十七年吟題墨色已成嫣
蟠虬老檜枝垂舞刻像前碑石載鐫
留賦縱然常滿壁玄機竟莫悟枯禪
道場法子藜居盛奚復蘆花施釣船
子固戊申載題道場已題壁素更留照
師以傳久遠

秋泊禪扉夜清吟入興頻風生水鱗甲雲放月精神禪
有機玄祕詩無句法新舊題尋不見吹遍壁間塵此
壬辰歲子固漫題照師不以為謬戊申重來請書與重
題共存每不自知愧耳孟堅再拜

趙子固梅竹譜卷

里中康節菴畫梅求詩因述本末以示之子

固

逃禪祖花光得其韻度之清麗閒菴紹逃禪得其瀟散

之布置回觀玉面而鼠鬚已自工夫較精緻枝枝例在
鹿角曲生意由來端若爾所傳正統諒末節捨此的傳
皆偽耳僧定花工枝則粗夢良意到工則未女中卻有
鮑夫人能守師繩不輕墜可憐聞名未識面云有江西
畢公濟季衡醜粗惡拙祖弊到雪蓬觴濫矣所恨二王
無臣法多少東隣擬西子是中有趣豈不傳要以眼力
求其旨踢鬚止七萼則三點眼名椒梢鼠尾枝分三疊
墨濃淡花有正背多般蕊夫君固已悟筌蹄重說偈言

吾亦贅誰家屏障得君畫更以吾詩疏其底

康不領此詩又有許梅谷者仍求又賦長律

濃寫花枝澹寫梢鱗皺老幹墨微焦筆分三踢攢成瓣
珠暈一圓工點椒糝綴蜂鬚凝笑靨穩拖鼠尾施長條
盡吹心側風初急猶把枝埋雪半銷松竹襯時明掩映
水波浮處見飄颻黃昏時候朧明月深淺谿山長短橋
開裏相挨如有意靜中背立見無聊筆端的瀝明非畫
軸上縱橫不是描頓覺坐成春盎盎因思行過雨瀟瀟

從頭總是揚湯法拚下工夫豈一朝

王翠巖寫竹求詩亦與

古畫畫物無定形隨物賦形皆迫真其次祖述有師繩
如印印泥隨前人尚疑屋下重作屋參以新意意乃足
晉魏而來幾百年義獻斷弦誰解續何況高束李杜編
江湖競買新詩讀願君種取渭川一千畝飽飯逍遙
步捫腹風晴烟雨盡入君心胸吐出毫端自森肅員大
夫來子章何碌碌

三詩蓋梅竹譜也然胸中無詩者見之捍格翠巖得詩後數月忽問余曰所求畫竹詩耳乃及李杜編何也余笑曰非君不解世無人為君言耳作詩必此詩定非能詩人不聞此語耶皇甫表工學於斯聞余言欣然求書正恐胸中無詩種又捍格也識者為余一撥余老不事多言云景定元禩良月六日所寓邸乃鹽橋王氏家二鼓燭下書諸王孫趙孟堅子固彞齋居士記

畫謂之無聲詩乃賢哲之寄興有神品有能品神者

才識清高揮毫自逸生而知之者也能者源流傳授
下筆有法學而知之者也伯氏彞齋天姿穎悟人品
既高以其文章書法之緒餘游戲翰墨為衆芳寫生
運筆如飛氣韻清拔生動造妙其入神品者乎乙卯
春子昌至自毘陵彞齋留侍筆硯欽慕師事口授筆
傳摹倣弗釋是秋彞齋遊壑翁聞幕子昌改館于
高文長之烟雨優游閑雅時而習之心得手應漸入
佳趣後數年彞齋獎之曰工於斯傳子固之餘芳者

其子昌乎彞齋已矣子昌之筆日進見侶之者而喜
子昌袖彞齋畫法詩卷求余著語余深嘉其志之篤
欲勉其藝之精超乎能品援山谷先生題宗室大年
畫卷云大年學東坡作竹石殊有思致筆意覺柔年
少故耳使大年耆老自當十倍於今精義入神子昌
勉諸淳辰中秋趙孟滌題

文信公途中三詩并簡卷

己錄于前

文信公小青口詩卷

乍見秋胡婦相憐遇楚兵北來鴻雁密南去駱駝輕芳
草平原路斜陽故國情明朝五十里錯作武陵行已
卯八月三日宿小青口五十里至桃源縣文山

宋賢十七劄子

葉正則觀牡丹詩帖

前日入寺觀牡丹不覺已謝惜其穠艷故以
詩悼之敢冀見和適上

牡丹乘春芳風雨苦相妬朝來小庭中零落已無數魂

銷梓澤園腸斷馬嵬路盡日向欄干跼蹐不能去

宋名公翰墨合卷

郭祥卿山頭詩帖

山頭翠律侵霄漢片幅之間據其半河水盤旋寒玉貫
雲氣濛濛中截斷峯巒回合平若按山城嵯峨聳樓觀
下有森森林木灌隱約浮空露纖巖沙平野曠征途遠
行人凌兢馬欲汗天機滿前呈爛漫濃墨如新色凌亂
渾沌鑿破太極判元氣淋漓風雨散若非定以范寬斷

誰能展此奇手段玉堂老仙重稱贊絕筆當為古之冠
牙籤玉軸宜倒看縱得千金慎勿換老眼摩娑獲珍玩
不敢留題只驚嘆吳郡郭麒麟

補錄

蘇東坡書蔡詩天際烏雲卷

草書

天際烏雲含雨重樓前紅日照山明嵩陽居士今何在青眼
看人萬里情此蔡君謨夢中詩也僕在錢塘一日謁陳述古
邀余飲堂前小閣中壁上小書一絕君謨真迹也綽約新嬌
生眼底侵尋舊事上眉尖問君別後愁多少得似春潮夜夜

添又有人云長垂玉筋殘妝臉肯為金釵露指尖萬斛閒
愁何日盡一分真態更難添二詩皆可觀後詩不知誰作也
杭州營籍周韶多蓄奇茗常與君謨鬪勝之韶又知作
詩子容過杭述古飲之韶泣求落籍子容曰可作一絕
韶援筆立成曰隴上巢空歲月驚忍看回首自梳翎開
籠若放雪衣女長念觀音般若經韶時有服衣白一坐
嗟歎遂落籍同輩皆有詩送之二人者最善胡楚云澹
妝輕素鶴翎紅移入朱欄便不同應笑西園舊桃李強

勻顏色待東風龍靚云桃花流水本無塵一落人間幾
度春解佩整酬交甫意濯纓還作武陵人固知杭人多
慧也

祇今誰是錢塘守頗解湖中宿畫船曉起鬪茶龍
井上花開陌上載嬋娟白樂天蔡君謨陳述古

蘇東坡

皆杭
守也

老却眉山長帽翁茶煙輕颺鬢絲風錦囊舊賜龍
團在誰為分泉落月中

三生石上舊精魂邂逅相逢莫重論縱有繡囊留
別恨已無明鏡著啼痕

能言學得妙蓮花贏得春風對客誇乞食衲衣渾
未老為題靈塔向金沙

右虞道園跋中所云賦詩四首者跋語已見前
茲不重錄

山中覆鹿拾蕉葉眼底生花二月明不道人生俱
夢裏新詩猶話夢中情

綠窓度曲初含笑銀甲彈箏不露尖人生莫待頭
如雪華屋春宵酒屢添

雲中初下勢如驚白鳳蹁跹雪色翎多少舊遊歌
舞地不堪回首又重經

桃花扇底露唇紅不復梳妝與衆同一曲山香春
去也荼蘼無語謝東風

一顆摩尼不染塵瑤池玄圃度千春昭陽殿裏雲
深處誰是當時解珮人

三月旌旗幸玉泉
牙樯錦纜御龍船
千官車駕如雲湧
楊柳梢頭月色娟

長憶眉山鶴髮翁
舊時阿閣贊皇風
如今流落那堪說
黼黻文章似夢中

鼓瑟湘靈欲斷魂
洞庭風浪不堪論
遙知舊賜宮袍錦
雙袖龍鍾總淚痕

興聖宮中坐落花
詩成應制每相誇
廬山面目秋來好
自杖青藜步白沙

右絕句九首柯丹邱跋中所云盡和卷中之詩
者丹邱跋已見前

日將公事湖中了醉入重城列炬明自古天藩財
賦地古人偏得賦閒情

謝女嬌吟雪比鹽北堂馬耳見雙尖衲衣政索歌
姬笑不道春寒繡被添

寫韻軒中塵不驚與誰同躡鳳凰翎采鸞可惜情
緣重祇合清齋寫道經

釵頭新綠荔枝紅那與江珧色味同聞道端明新
進譜一時殿閣起薰風

香辟春寒玉辟塵流蘇帳斗醉和春一雙明月都
無價寂寞人間第二人

江南在處煙波好浪迹先生不上船近就闔閭城
外宿可憐江月夜娟娟

青城樵者一衰翁寫罷烏絲滿袖風消得玉堂金
研匣至今傳入畫圖中

聽碾龍團怯醉魂分茶故事待誰論
纖纖玉腕親曾見祇有春衫舊酒痕

白公種竹蘇公柳談笑功名後世誇
依舊對雲三萬丈斷橋誰與築隄沙

奉同柯丹邱前後用韻凡九章言無倫次且有
廣平媚語之罪信識法者懼也癸未冬十一月
九日吳郡張雨為子明王君寫

盈盈秋水眼波平脈脈遠山螺翠橫
西北風帆江

路永片雲不度若為情

雨挾江潮來浦口霜凋木葉見山尖
寒波曾照飛鴻影髭雪朝朝與恨添

風雨翻江夢裡驚忽思風馭絳霄翎
世間安得麻姑爪癢處爬搔憶蔡經

湖邊窻戶倚青紅此日應非舊日同
太守與賓行樂地斷碑荒蘚卧秋風

奎章閣下掌絲綸清淺蓬萊又幾春
三十六宮秋

寂寂金盤零露泣仙人

戊申十月十七日攢

蔡公閩嶠雙龍壁蘇子儋州萬里船何事歸田虞
閣老醉吟清浦月娟娟

嗜酒狂吟禿鬚翁華陽壇館百花風晚年傳得登
真訣歸卧南山礪谷中

十九日又追和虞奎章韻

東閣小書詩夢破後堂殘醉燭花明春風客散茶

香在寂寞人間萬古情

紅入兩顰春意滿翠籠雙袖曉寒尖雖知別後情
難減也覺愁中醉易添

彩筆詩成舉座驚素衣新剪鶴毛翎多生應是蓮
花女留得銀箏金字經

透海丹砂一粟紅前身宜與後身同就中只換神
仙骨塵業何由到素風

滄海桑田復幾塵東風惟見落花春須知剩水殘

山外冰雪肌膚別有人

蜀人文彩相先後多在西湖載酒船腸斷至今湖
上柳空殘眉翠簇連娟

三百年來此兩翁詩人情性道人風醉中還是毘
耶老花雨紛紛一笑中

梅花香冷返冰魂往事茫茫迹未論寶劍已隨龍
化去誰憐水上刻舟痕

賦罷仙人萼綠華金聲玉色衆中誇歸來世上空

塵土雲白江清月滿沙

洪武十四年歲在辛酉秋九月朔義興馬治

六藝之一錄卷三百八十二

欽定四庫全書

六藝之一錄卷三百八十三

錢唐倪濤撰

歷朝書譜七十三

元賢墨蹟

詩翰

趙文敏書春寒詩卷

仲春尚寒氣林花無艷滋
敝裘擁衰疾風雨何淒其
始雷發東隅霽牖陽光披
微風草際動落英池面移
幽禽變圓吭游魚揚四鬣
我病自此愈泛舟溪水湄
小輿指

南蓋短筇步東毗機心不復有高蹈農與義

笠澤茫茫雁影微玉峯高下護雲衣長橋寂寞春寒夜
祇有詩人一舸歸子昂二月十九日

趙文敏書詩

行書

白髮思家萬里回小軒流水為花開故應動作詩千首
知是風流楚客才

趙文敏書絕句

古墨輕磨滿几香研池新浴粲生光北窓時有涼風至

閒寫黃庭一兩章

趙文敏過西郊渡詩帖

遠山含紫氛春野藹雲暮值此歸時月留連西澗渡謬
當文墨會得與羣英遇賞逐亂流翻心將清景悟行車
儼未轉芳草空盈步已舉候亭火猶爰村原樹還當守
故局恨恨愜幽素子昂

趙文敏書盤谷詩

昔尋李愿向盤谷正見蒼厓巨壁爭開張是時新晴天

井湓誰把長劍倚太行衝風吹破落天外飛雨白日灑
洛陽東蹈燕川食曠野有饋木蕨牙滿筐馬頭溪深不
可厲借車載過水入箱平沙綠浪榜方口雁鳴飛起穿
垂楊窮探極覽頗姿橫物外日月本不忙歸來辛苦欲
誰為坐令再往之計墮渺茫閉門長安三日雪推書撲
筆歌慨慷旁無壯士遣屬和遠憶盧老詩顛狂開緘忽
覩送歸作字向紙上皆軒昂又知李侯竟不顧方冬獨
入崔嵬藏我今進退幾時決十年蠢蠢隨朝行家請官

給不報答無異雀鼠偷太倉行抽手版付丞相不待彈
劾還耕桑 子昂

張師道

伯淳楞伽古木詩帖

楞伽古木山門前下有山石摩蒼天道林卓錫舊種此
彷彿于今八百年皴皮剝腹不自愛猶是童童一車蓋
矯然化作龍虎蟠勁節不為霜雪改或時孤高烈風起
蒼茫白日雷雨至從容下蔭數百人赤金六月流清氣
卷曲擁腫也可憐天賦楞散終天全道林不世骨已朽

人間歲月何足言辛卯五月十三日

鮮于伯機遺墨卷留題廣嚴寺

送客臨平古佛祠聞公房裏住多時驪哥不見金閨彥
濁酒聊參玉版師龍象彫零餘故塔蛟鼉斷缺有殘碑
藕花未發風蒲短空詠參寥七字詩

道中一絕留題淨慧壁

野醪醺發氣薰然睡起時驚雪入船安得鴻羣三百衆
空令饞客口垂涎

淨慧寺四絕

寂寂僧房半夢中
蕭蕭脩竹四山風
唯應門外蒼髯叟
解識儋州禿鬚翁

曉雨纔收日已西
石梁沙路淨無泥
清泉瀲灩千峯迴
綠柳陰陰一鳥啼

壞壁蒼蒼上綠苔
籠紗無復護塵埃
只應枉駕遊山客
總為坡仙寶墨來

學道當知髓與皮
聖門閫奧要探窺
十年來往臨平道

爭信山中有許奇

又戲題廣嚴僧房壁

幾年門外策征驂
不料能來共一龕
壁上未須書歲月
褚河南是護伽藍
鮮于樞頓首

鄧文原龔璠二跋見前

袁靜春寓錢塘雜詩帖

寓錢塘雜詩求教袁易頓首

舟行漫興

涉世恒多故謀身轉益迂馬周聊逆旅阮籍豈窮途
宿依船尾楓凋落酒壺遠行慄慄意對此不能無
白霧籠舟楫青山失畫圖往來迷咫尺收歛忽斯須
野曠連飛鵲江清映遠鳬還將明媚色且復慰征途

隄柳歌招纜江花笑入舟高歌鳬鵠起濶視水雲流
牢落江淹恨飄零庾信愁都將付尊酒短髮得禁秋

憂患看飄瓦浮沈任轉蓬題詩霜葉赤對酒燭花紅
阮情何曠陶韋意未窮前賢負高興不必萬人同

重午客中雨

往恨湘纍遠他鄉楚俗同流傳存弔祭汨沒見英雄竹
葉於人綠榴花此日紅未須嗟旅泊吾道豈終窮
湖上冥冥雨和愁細似塵翠嵐沾玉塵清潤逼綸巾他
日看濃抹茲晨做涉溱遂語山水意有為苦留人
令節殊方客虛樓暮雨時何心吟鑄鏡子髮欲成絲
歎誰浮玉芳醪且滿卮今朝羈旅思更用獨心為

懷吳中諸友六首

風雨蕭齋裏雞鳴夜向晨簡編心力盡燈火髣髯毛新餘

地知游刃何人解斲輪煩君毋割席漂轉暫埃塵

錢德鈞

並馬春風陌高歌夜雨牀追游前夢失漂泊此身忙綠

酒西湖色冰肌六月涼難招髯似戟來對玉成行

蕭子中

卓行拘常調微官更數移君懷同棄屣吾道歎如絲獲

落才高世飛騰命與時晚成梁棟器剝破十年遲

湯師言

枉策招尋密高談謔浪俱他鄉懷楚奏何日攬桓須白

月垂紋練青天落酒壺看君話心事餘子盡崎嶇

唐希賢

共話巴山雨曾題華步秋儒官雖寂寞公子足風流即

擬同吳詠焉知效楚囚江南新作賦寄爾恐添愁

趙明仲

右十三詩命意閒遠下語清麗可謂不流於俗矣然
少加精密杜少陵黃山谷不難到也困學民漁陽鮮
于樞題其後而還之大德辛丑冬至前一日也

寬少喜考論吳中前輩嘗閱黃文獻公文集載袁靜
春先生墓誌知其為吳人而尤以不得見其子孫為
恨他日社學師袁以昭氏過予談及其家世則靜春

乃其五世祖也又明日挾靜春所寄鮮于太常游錢塘雜詩來示於是靜春之子孫既得見之又得見其手跡而詩有懷吳中錢德鈞以下諸友之作又因得見前輩數人於一日間為欣幸久之吳寬

卷中有龔璠于文傳貢奎陳方鄭元祐柳貫姚安道黃潛明王璉吳訥十跋文繁不及備錄

吾子行手迹

內詩五篇

桃花雨樂府一章寄翼之

秦源春夢陽臺晚風散驚紅作秋苑閒陰碧樹搖暖雲
茸苔羅水香氤氲蝶飛不濕烟錦路吳娥怨澀鷺階步
參差海羽雙燕來依微石舞瀟湘回

古詩一首送翼之回吳

游子動歸思南風起秋聲我亦當此時相送難為情交
朋尚如斯況爾懷父兄三吳亦鄰邦一水非遠程君還
姑蘇臺我留鳳凰城兩地各相望馳心互奔傾流光若
頽波彼此即寓萍浮世苦離散輾轉百慮縈何能慰予

懷握手徒營營

次韻謝錢翼之

筆翰西臺妙文章五鳳樓美才須比玉直道豈如鉤吳苑辭春色江風散旅愁吾廬正蕭颯二仲得羊求

菌耳徧沃野

菌耳徧沃野瓊枝亦芬芳羣陰掩其茨誰復知爾良我願得此草移根植崇岡間攀紫金蕤挹露晞朝陽服食換綠髓輕舉過紫皇招攜三辰游與之同輝光

與鄰寓人隔屋對月夜話

禦寇連牆屋神交得謝瞻

謝有隔屋夜語事

偶逢吾所契共語

夜當簷微祿終何補良才尚此淹憑君縱玄論未怪發

幽潛

右故人吾子行手迹十二紙皆前後得之於書夾所
藏復恐散落集而存之其為人見石塘胡先生所為
墓銘茲不書後三十年為至正五年己卯九月九日
江邨民錢良佑識

仇山邨七言詩卷

行書

我本迂疎落拓人滿頭霜雪滿懷春登山有屐身恒健
挂壁無絃趣更真往歲效官殊漫浪老來學佛離貪嗔
却憐衛鶴齊雞輩空費心機不庇身

野鶴清高六翮輕孤雲萬里去冥冥漢科合應茂才舉
唐士曾書遺教經好趁江南諸老在盡看薊北衆山青
錦衣歸日春風滿期醉沙隄雙玉鉶

懶學羊裘漢子陵亦非解印晉淵明好山好水恒相對

浮利浮名不願爭詩酒每尋朋友共田園都付子孫耕
野心直與閒雲似却笑孤雲出岫輕

末俗由來不貴儒愚夫愚婦恣擲揄束書合向山林隱
絕迹莫登名利塗膝上有孫貧亦樂門前無債醉如愚
咸平處士真堪羨死守梅花住裏湖

宦海漂流四十年老來默默守吾玄艱危頗得文章力
嫁娶各隨兒女緣白飯充腸聊當肉好書到手不論錢
閒心懶作邯鄲夢樂取南窓一枕眠

筆硯生涯獨善身一區花竹四時春
無求莫問朝廷事有恥難交市井人
簾外烏衣飛下上窓前絳蕊結輪囷
鑑如居士東鄰住肯借霜毫為寫真

難得心交左伯桃亦無善相九方臯
而今賤子多儒誤自古山人索價高
衆鵲豈能知鵲志一雞何足用牛刀
獨醒獨醉俱堪樂妙理依然有濁醪

倦游懶着小烏巾短髮絲絲白滿簪
信手拈書聊慰眼轉頭忘事太無心
笑他杜老頻看鏡愛我昭文不鼓琴

喜有山林方外友時攜佳紙索新吟

北風雨後忽南風頃刻開晴又轉東
后土未乾偏有恨漏天難補愧無功
小樓兀坐思猿鶴好客相逢避燕鴻
壁上墨蘭香可掬令人長憶所南翁

豪氣年來漸掃除簞瓢自樂守臞儒
江頭盡醉唐朝士澤畔行吟楚大夫
萬里鯢鵬何必羨一官蠅蝨不如無
葛巾草屨從人笑莫問青衫口葉枯

士瞻上人習定好修與予晦翁笑隱
長老三世交矣求

予斐童遂信手寫七言十首塞白上人其為我佛前懺
悔綺語業至治元年九日山村老友仇遠書於北橋躬
行齋

釋妙聲弘道守道衍四跋已見於前茲不重載
外又有口爽梁用行姚性顧應祥四跋以其文繁
不及備錄

龔子敬宣城詩并識卷

行書

年華荏苒故客況寂寥新雪融疑是雨風和欲近春疎

梅紫小鳳宿藻負潛鱗書閣閒登望時煩載酒人書

閣

宿雨池館淨閒官造請稀石榴朱夏色山鵲青雲飛遐
矚臨風檻冲襟散暑衣陳編撫芳潤脉脉髮初晞偶

題

久客有遠思肩輿登郡樓聊為避暑飲更學御風游疊
翠城南面雙虹水北流流將五湖去葉葉采蘋舟郡
樓

古道直如矢古人能斷金今人思古人寥落誰知音
旭
日臨前除暄風散幽襟相彼好鳥鳴擇陰嘉樹林豈無
念朝飢漑之釜與驚大川無停波高山上欽岑白髮何
由玄寒暑日夜侵叔孫獨楚製莊生常越吟載歌行路
難歌闕意彌深

葦荷不用織采蓮尚可食芳時安可常秋風鳴槭槭美
人明月璫青霓以為裳手攬北斗柄低昂挹天漿天漿
解渴心下土何茫茫九壯閭闔開寸誠函綠章焉得飛

仙術與陪鸞鶴翔所憂歲年駛敢畏道阻長啓戶辨夜色驅車遡晨光終然江海溼臨路空徊徨 述懷二首

松閣啓晨眺東雲白英英空尊媿坐客函道聞屐聲郊墟地自扃林巒暑逾清官居屬冗散朋從多淡成拂塵急雨過聯鑣去隄平書味一何長襟期浩已盈挑燈展篇什寤寐山中行 次韻劉景初偕陳元佐見訪

離騷之國幾千里十幅蒲帆順風駛風順猶須兩月程伊誰移來墮書几張君墨妙游戲爾亂峯因君接天起

蒼然古木摧不死君應曾隱茅屋底得非是間種蘭芷
慘淡經營那及此松連閣上聽松聲讀書眼花字如蟻
玉立長身挾童子披圖置我平生喜憶昔詩家愛許渾
凌歊荒臺尋舊址云何姑孰大江邊望湘潭雲尺有咫
我今識君意總為詩料理雲兮楚之雲水兮湘之水迴
雁夕陽啣一葦山高見衡嶽江遠會南紀君兮君兮可
奈何我詩敢劇屈賈壘 楚雲湘水圖歌謝張師夔教
授

雄促朔雌迷離自是生生無盡期如何昔人好異說兔
子之孕惟望月水中影對素秋圓天上身居廣寒闕烏
鵲相傳枝白鴟但應風走物具四支毛與羽不同螭虎
亦四足無路通水穀雖則能變化蟲豸竟偏枯氣化飛
之徒形交走之屬驗從上古燔求爾在野逐韓公滑稽
毛穎禿八竅吐生殊駭俗不須更問然不然至今富有
中山族 題李克復治中所藏兔圖

墨雲過雨月正黑手摘虛空了無迹一架縱橫碧落秋

戒壇池上僧房側 題溫日觀葡萄

桃似胭脂梨似雪 折花人是惜花人
折枝圖上堪腸斷 忍更題詩破費春
老錢折枝

小舟尋夜泊 明月散風濶 故人相別處
雙鷺立前灘

泊舟

予歸京口省墓天錫出此紙徵予書宣城詩記憶不甚
真天歷二年孟夏二日龔璫識

張天雨李肇亨二跋見前

郭天錫書遺林上人詩卷

題宋春卿城市山林

功名身外聊復爾邱壑胸中實過之盤谷壽康懷李愿
輞川蕭洒友王維何人使氣缺如意老子放懷金屈厄
市井收聲涼氣永竹風杉月亂書帷

普照寺楚山閣

白衣處士息羣機高閣登臨送夕暉吳地荒涼征馬盡
楚山空濶斷鴻飛書間塔影來朱戶月落鐘聲殷翠微

直下先人敝廬在莫年蓮社得相依

大年便面

疎雨灑荷氣微涼生柳陰閒亭不受暑坐占清湖心無
客且罷暴有風宜披襟向來行路錯足底黃埃深此意
一領會落日孤蟬吟

為僧作山水

門有方袍客圖成水墨山我非求肖似汝亦愛幽閒密
樹難分辨高雲任往還行當絕世事終老屋三間

有客被方袍合爪前致辭不獨愛公畫仍復愛公詩詩
成縱意書了此一段奇世人稱三絕公胡不自知我心
了不知晚歲聊嬉嬉向來用世心轉首成棄遺所嗟聞
道晚倏已雙髻絲前賢去已遠來哲未可期寓行宇宙
間悵悵欲何之願誨樂石言再拜真吾師

三月十日寄了即休

白水起寒霧蒼林騰濕烟會心圖已竟假筆竟難傳一
悟空中色相忘定外禪裹茶來竹院風雨落花瓣前

送樂伯善赴都

石磴雲昏筍蕨香
江城花落鶯燕忙
黃金臺高地形聳
白玉堂深春日長
之子顯擢神所與
斯道將亨民小康
臨行握手出軟語
東鄰夜雨淋糟床

燕趙感慨鼓俠氣
江湖搖落嗟虛華
艱危歷盡為憂國
事業無成非戀家
江光隱見魚龍窟
雲海蒼茫鷗鷺沙
桃花水長三月暮
片帆挾雨飛天涯

篆籀堆床窺逸跡
歌詩到耳遺古音
歲華正似阮孚屐

世事真成昭氏琴剪毛肥羊快一飽泛駕駿骨輕千金
暄風拂帽春衫薄小憇宮牆楊柳陰

趙千里小景

鸛鵒喧柳陰生鵲樂清泚竹風遞荷氣長夏涼如水王
孫翰墨仙丹青絕紈綺何當著幽人艇子沙頭艤

元暉山

灌木蔭滄洲閒雲疊層巘茅茨在只尺逕路渾莫辨黃
家玉印章翰墨屹冠冕悵望海嶽菴禾黍西風轉

下隍朱氏竹山圖

鳳臺東南山萬重山人宴坐何從容乾坤清氣不可遏
一夜春雷起籜龍詩家襟度蔚蕭爽百尺琅玕日應長
我欲驅車訪此君只恐山靈杜來往

題米南宮像

海嶽菴空骨已仙風神超邁畫中傳凌雲健筆飛光怪
不顧人間喚米顛

題滿川花馬趙子昂畫

曲江洗刷雲滿身雄姿逸態何超羣眼中但覺肉勝骨
幹也合讓曹將軍嗟哉今人畫唐馬藝精亦出曹韓下
玉堂學士重名譽一紙千金不當價山窓擁雪觀畫圖
據鞍便欲擒於菟天廐真龍有時有杜老歌行絕代無
客有蓄青玉荷盤色奇古檠杯作蓮蓬下屈
為柄上覆作蓋蓋十九點青質而紫章匠氏
刻為蓮房殆奪天巧故人元復初命不肖賦

詩

碧雲亭亭水天永翠蓋翻風墮秋影文姬團扇感初涼
露華亂落明珠冷紫莖綠葉歌秋蘭涉江折得煙蓬還
前緣已被專房誤守宮血點猶斑斑麴生解后誇奇特
倒捲滄溟供一吸太華峯高歸路遙但覺滿懷春拍拍
俗眼傲睨琉璃鍾金罍未用爭誇雄嗚呼古詩調高和
者寡擬喚杜陵醉中把

錢良祐跋見前

揭文安雜詩卷

草書

家居魏亭北，惆悵自無華。風俗似太古，生涯如小家。飲醇猶恐過，衣帛尚疑奢。稍與鄰人異，詩書有五車。題

真村堂

日與世情遠，學人聊治生。畦蔬多品類，樹果各生成。野老過偏數，山禽近不驚。詩書吾所好，農圃也須明。題

園趣亭

雙松臨古屋，蕭灑高人情。蓬戶常深閉，山橋時獨行。欣聞急澗響，復愛晚風清。世事如解帶，誰謂戀簪纓。題

山水卷

天歷年中秘閣開授經新拜育羣材宮門待漏常先到
講席收書每後回召試時蒙天語勞分題不用侍臣催
滿頭白髮丹心在太液池邊只獨來

宮草慈茸禁樹齊日趨延顥對凝暉朝迎步輦花間立
暮送回鑾柳下歸碧殿東臨瓊島近金河北引玉泉肥
幾回弘慶門前路春氣濛濛欲染衣

已已羣儒應壁奎端陽侍宴寶慈西線分學士親臣送

詩賜皇姑御手題注酒含春瑤露重承塵轉午錦雲低
日斜共出西門道既醉猶能散馬蹄

奎章分署隔窻紗不斷香風別殿花留守日頒中賜果
宣徽月送上供茶諸生講罷仍番直學士吟成每自誇
五載光陰如過客九疑無處望重華 憶昨四首

宮詞一首

碧殿陰陰玉漏遲流鶯雙轉萬年枝平明小輦花間過
又是君王幸閣時 揭傒斯

項元汴跋見前

馮思溫贈奉境詩

胄出名門正妙年
置身聊爾奉藩宣
塵生驛路頻驅馬
雨溢官河穩放船
后土祠中花綴玉
平山堂下柳飛綿
遡歸公館應多暇
好對芸窗理舊編
晉陽馮思溫

虞道園雜詩卷

白雲護窻雪鳴竹
地爐深深火初熟
樵客晨來午未還
真人自與燒黃獨

鑪中鉛汞輕千乘
窗外日月飛兩螢
尚有度生情未斷
侍人長跪授黃庭

玉臼搗霜月當戶
竹窓映雪書滿床
客來長揖不交語
自撥丹火燒山香

皎皎霜鶴立齋厨
蕭蕭風竹鳴庭除
窓間有客自高坐
堂上真人方讀書
十一月壬辰明復真人約華陰王
廷鎮閩中潘子文四明王安道談道話於徐中孚丹房
微雪灑空塵靜雲晏遂復終日即事雜詩

松陰鵲立候宮車風送飛花著白鬚水影漸隨簾側畔
鶯聲祇在殿東隅近床擬進新琴操載筆親題真畫圖
太液雨餘波浪動龍舟初試散魚鳧 早朝

高閣丹青起中天紫翠分窓當太白雪門對九疑雲伐
木山人去吹簫帝子聞塵中歸未得春思轉紛紛 錄
寄民瞻尊兄別後一笑虞集

虞道園詩翰

九月二日移柴門向水辱玄卿外史鍊師賦

詩相屬及於老易之要佩服雅意忻懌亡已
輒次韻一首為謝仙凡之語頗不類矣皇恐
皇恐集再拜

老寄池邊舍新移竹下門高人知獨樂妙語枉相存衣
食隨年歲文章付子孫惟求園綺輩白髮共清尊

喜陳克紹自蜀中持舍姪書至用韻就呈上
有客持鄉信殷勤遠及門枯桑同我老慈竹賴誰存萬
里迷歸夢蒼茫念老孫徧呼小兒子一一話親尊先

丞相

闕

秦國夫人墓上枯桑駐烏郡以孝感所致雍公

有辨烏賦荅

闕

所示詩也枯桑近年更生大悲閣先

公祠前生竹一本中間兩枝枯而復榮鄉人以為集當
歸之祥鄉中及朝士皆有詩也是日榻中書

題缺

黃金鑄為鴨焚蘭夕殿中窈窕轉斜月逶迤動微風綺
席列珠樹華燈連玉虹無眠待顧問不知清漏終卽菴
奉寄白雲閑公講師鄉契尊宿虞集上

古寺白雲間鐘聲竹樹間唐詩留屋壁蜀道憶鄉關橘
柚霜前送袈裟雨裏還沉淪三十載刻石玉遮山至正
乙酉十月六日榻中書

虞道園答翼之詩卷

集頌首翼之賢良學士閣下昔在朝著不能奉揚文翰
之美歸來山中徒增悵惘從白雲寄示詩卷益見高情
輟綴鄙句卷尾而截留其前留之篋笥永以為玩也為
劉彥明作得墓表數句敢煩大手代作楷書并篆額一

是不知彼中得石大小一是集久苦目障作字甚艱不
復能多字也非恃愛厚不敢爾唯翼之千萬恕察聞令
嗣為學甚好恨久不相見秋間當得會晤傾倒不宣契
生虞集頓首再拜

吳郡名家盛有唐流傳風致到錢郎閉門三月梨花雨
編寫千林柿葉霜客看舊題驚歲月僧將新句度江鄉
莫愁茅舍淹遲久秋菊春蘭各自芳 右答翼之祕校
枉教之意以奉千里外一笑虞集頓首

錢子工書越宋唐詩筒千里寄支郎揮毫曾見坐霏
屑待漏尚憐靴滿霜商嶺歌殘紫芝曲釣天夢遠白
雲鄉不迷故舊相思意酬唱同流百世芳 僕過吳
中翼之庾兄出示虞先生所答詩卷輒亦次韻以寓
羨慕之意時至元戊寅六月十又三日金華胡助

聖代崇文邁漢唐相如詞賦早為郎天門侍燕常終
日江閣懸車已十霜展卷得詩驚健筆感時懷舊憶
它鄉先生絕學追千古一樹寒梅壓衆芳 文昔以

筆札從侍書公著書閣下公去國今十年矣去年夏
謁公于臨川之里第今年秋將如懷孟過姑蘇錢先
生出公手札并詩示文伏讀悵然先生俾題不敢固
執至正元年九月十又七日新安程文謹識

翼之得邵菴所寄篇翰裝池成卷攜以示余因有感
於其愧悔之言亦次增諸卷軸柳貫上 漢庭有道
起馮唐亦許明光對夕郎正為青雲凝素髮故教白
兔擣玄霜客來笑我臨書札禮達如雲講射鄉閭老

無時收衆望，褐夫有日譜羣芳。

筆翰風流說晉唐，敢將拙惡比諸郎。健毫日費徒成塚，禿鬚年侵不待霜。才士宜從鵷鷺序，崎人合住水雲鄉。豈期天藻亭中老，遠寄詞章勝采芳。

良右嘗

奉和虞公所答詩，為謝適中州盧彥紀侍官臨川。遂書以煩往達，後古愚編修見，謂宜以附卷末。是年六月，望日錢良右。

張夢臣贈季境詩

春滿維揚十萬家先公曾此駐高牙官廳寂寂留芳樹
舊館陰陰閉落花祠下繫鞍尋芍藥樓前騎鶴聽琵琶
歸來不異當時事一路東風帽影斜張起巖

歐陽原功贈季境詩

至正丙戌暮春亞相王公本齋之子季境補淮
東宣閫奏差以公事來傳至京師訪予玉堂
之署臨別求贈言為賦唐律一首

南來驛騎錦障泥春雨都門雁影低淮瀆慣迎膚使節

浚郊曾築相君隄道逢棠蔭思親憩家視槐陰與屋齊
江左夷吾吾舊友羨君年少躡雲梯廬陵歐陽玄

歐陽原功送自得詩

豫章熊君自得攜所著書入都城西山齋堂
村山深民淳地僻俗美隱者之所宜居崇真
張宜相真人偕往作詩送自得并東宜相平
心老人歐陽玄

先生去隱齋堂村境趣佳處如桃源西出都門二百里

山之盤屋水浩疊一重一掩一聚落一溪十渡深而渾
羊腸險逕掛山腹蜂房小屋粘雲根立當阨塞若關隘
視入衍沃同川邈市朝甚邇俗塵遠土產雖少人烟繁
鉏耬藝陸宜菽麥樹柵作園能雞豚園蔬地美夏不燥
煤炭價賤冬常溫前年熊郎入賣藥施貧者藥人感恩
熊君攜笈今就子繞舍木葉書續繙崇真真人又繼往
況是偁佺之子孫紫簫夜吹遼鶴至林響谷應松風暄
登高東望直沽口海日湧出黃金盆應憐曼倩戀象闕

坐羨龐公歸鹿門

趙彥恭樵林楓葉詩帖

行書灑金紙

樵林夜鳴楓葉僧扉畫掩烟蘿夢裡好山十二不知何處雲多趙肅題

潘牧次惟寅懷古詩

至正辛丑冬惟寅先生以懷古十二詩示僕
讀之有古烈士慷慨悲歌之風當時士大夫
和者甚衆僕亦忝居契家之好故敢次韻成

章鄙俚可笑非敢以言詩也謹呈求教契生

潘牧

吳都富且艷翠袖倚層臺歌吹凌春色旌麾駐越來繁
華忽消歇珠玉風中埃

青山瘞寶劍草偃千秋墓金鳬入夜飛玉漏沈寒露轉
盼陵谷遷非從缺爐步

句踐嘗膽日堅銳不謂無一朝獻西子越兵成大呼回
睇長洲苑千秋生碧蕪

青山翔鳳凰紫氣繞吳關
玉泉湛若鏡靈鷲飛不還
重瞳在何許汨灑莫能攀

翠華竟南渡夷門不復都
長城乃自壞黃龍孰能屠
空令二宮泣五國聽啼烏

尚父擁玉節錦衣當畫行
輝光照閭里千載英風生
至今牛斗下還瞻紫氣橫

懷古六詩謹次韻錄上

弔古上靈巖日暮下琴臺
蕭蕭紅葉落采香人不來
鳴

夷今得計句踐亦塵埃

吳宮事已遠王謝宅亦無山鬼話亡國松關夜相呼白
露泣紅蘭青燈照碧蕪

荒邱壞古隧言是孫策墓墓草生輝光零零泣清露想
當立國時英雄稱獨步

南渡中興日君臣此建都共憤太宰譏子胥忠見屠武
穆何由死欲聽延秋烏

國亡喬木在鳥鳴自關關人隨歸雁遠春從沙塞還怨

別惟宮柳長條復誰攀

山僧講經地玉輦昔曾行
寢殿野花落空巖雲氣生
敗亡猶得士千古讓田橫

鄭明德齋課詩帖

齋課詩寫寄伯貞契兄併簡仲致舍人叔方孝廉也遂
昌鄭元祐頌首

武帝親郊太乙神流光涵旭動星辰
竹宮典禮猶存漢軼道山河已易秦
香逕至今啼木客露盤無淚泣仙人

紅燈幾點東風裏猶是元宵一度春

錢唐江上雪初晴鵲樓前月正明萬炬金蓮開火樹
六龍翠轡降瑤京簫韶並入鈞天奏宮掖謹聞下土聲
猶是向來歌舞地鬼燈寒雨暗荒城 元宵懷錢唐二

首

上元甲子天開日泰定更新詔下時親舍晚依吳子國
客窓山近偃王祠墻陰宿草春泥濕屋角鳴禽曉日遲
西堠梅華政如雪晚來橫笛為誰吹 甲子新歲

華髮垂垂到鬢髻青春故故人拋生同失木狙分茅
不及知風鵲有巢楚澤生涯千樹橘杜陵破屋幾重茅
此時歸老南山下不夢朱干舞玉梢 次韻蔣春卿見
寄

燕城孤起暮雲中邊燧漂沈樓櫓空鬼燐不銷忠義血
史臣誰著簡書功銅鹽利聚吳王國歌舞香殘煬帝宮
惟有紅樓舊時月朱簾垂處捲春風 揚州一首寄嚴
治中裕之

錢王宮闕莫烟平陸海金蓮此夜明潮去潮來淪霸業
花開花落故陪京九天歌舞銷塵劫萬井輪蹄捲市聲
今日桓伊江上笛卧吹落月下空城 和徐生芾元宵
有感

子源學士泉行之教授當同發一笑元祐



六藝之一錄卷三百八十三